

Broj: T18 0 KTRZ 0004597 12
Brčko, 10. novembar 2014. godine

OSNOVNI SUD
BRČKO DISTRIKT BIH

Na osnovu člana 35. stav 2. tačka z) i člana 226. st 1. Zakona o krivičnom postupku Brčko distrikta BiH, podižem:

O P T U Ž N I C U

Protiv:

SALIJEVIĆ NERMINA, zvaní „Gumeni“, ... rođen ...1968. godine u Brčkom ...

Što je:

Za vrijeme oružanog sukoba u Bosni i Hercegovini, na teritoriji predratne opštine Brčko, u koncentracionom logoru Okrajci u Gornjem Rahiću, suprotno pravilima međunarodnog humanitarnog prava i odredbama člana 3. stav (1) tačka a) i c), člana 13. i člana 17 III Ženevske konvencije o postupanju sa ratnim zarobljenicima od 12.08.1949. godine, odredbama člana 3. stav (1) tačka a) i c), i člana 27. IV Ženevske konvencije o zaštiti građanskih lica za vrijeme rata od 12.08.1949. godine i člana 4. stav (2) tačka (a) Dopunskog protokola uz Ženevske konvencije od 12.08.1949. godine o zaštiti žrtava nemeđunarodnih oružanih sukoba (Protokol II), kao pripadnik naoružane paravojne grupe "HOS", prema licima koja ne učestvuju u neprijateljstvima i ratnim zarobljenicima, a u odnosu na koja se mora postupati u svakoj prilici čovječno, bez ikakve nepovoljne diskriminacije zasnovane na etničkoj ili vjerskoj pripadnosti, vršio povrede tjelesnog integriteta, mučenja, primjenjivao naročito uvredljive i ponižavajuće postupke kojima se vrijeđa lično dostojanstvo, pa je tako:

1) zajedno sa pripadnicima paravojne grupe „HOS“ S. R. zvanim „...“, R. H. zvanim „...“ i L.V. zvanim „...“ u logoru Okrajci, nakon što bi uniformisan i naoružan stražar A.M. zvaní „...“ otključao prostoriju obloženu limom bez prozora i svjetlosti za privremeno lagerovanje mesnih proizvoda u hladnjači gdje je sa više lica srpske nacionalnosti bio zatvoren S. M., koji je 06.05.1992. godine nezakonito lišen slobode kao civilno lice i koji je zadržan u logoru do 29. juna 1992. godine, skoro svakodnevno u različito doba dana i noći ulazio u prostoriju i zajedno sa R., H. i V. zlostavljao M. tako što ga je šutirao i udarao u predjelu glave i po drugim dijelovima tijela,

2) zajedno sa pripadnicima paravojne grupe „HOS“ S.R. zvanim „...“, R.H. zvanim „...“ i L.V. zvanim „...“ u logoru Okrajci, nakon što bi uniformisan i naoružan stražar A.M. zvaní „...“ otključao prostoriju obloženu limom bez prozora i svjetlosti za privremeno lagerovanje mesnih proizvoda u hladnjači gdje je sa više lica srpske nacionalnosti bio zatvoren K.N., koji je 09.05.1992. godine nezakonito lišen slobode kao civilno lice i koji je zadržan u logoru do 29. juna 1992. godine, skoro svakodnevno u različito doba dana i noći ulazio u prostoriju i zajedno sa R., H. i V. zlostavljao N. tako što su ga udarali nogama i rukama u predjelu glave - lica, stomaka i drugih dijelova tijela, a od udaraca N. je padao na zemlju i bio je tako premlaćivan da nije mogao ustati,

3) zajedno sa pripadnicima paravojne grupe „HOS“ S. R. zvanim „...“, R. H. zvanim „...“ i L. V. zvanim „...“ u logoru Okrajci, nakon što bi uniformisan i naoružan stražar A. M. zvaní „...“ otključao prostoriju obloženu limom bez prozora i svjetlosti za privremeno lagerovanje mesnih proizvoda u hladnjači gdje je sa više lica srpske nacionalnosti bio zatvoren D. Z. zvaní „...“, koji je kao pripadnik Vojske Republike Srpske zarobljen u naselju IV juli u Brčkom 12.05.1992. godine i koji je zadržan u logoru do 29. juna 1992. godine, skoro svakodnevno u različito doba dana i noći ulazio u prostoriju i zajedno sa R., H. i V. tukao Z., a jedne prilike Z. su izveli u upravnu

zgradu gdje mu je naređeno da klekne, pa su ga potom šutirali i udarali po raznim dijelovima tijela,

4) dana 13. ili 14. maja 1992. godine R. M. zvanog „...“, dok je ispitivan u Stanici javne bezbjednosti Brčko sa sjedištem u Gornjem Rahiću, okvirom od puške zvane „Špagin“ više puta udario u predjelu glave, od udaraca je došlo do pucanja kože i krvarenja, a lijevo oko se zbog krvnih podliva zatvorilo,

5) zajedno sa pripadnicima paravojne grupe „HOS“ S. R. zvanim „...“, R. H. zvanim „...“ i L. V. zvanim „...“ u logoru Okrajci, nakon što bi uniformisan i naoružan stražar A. M. zvan „...“ otključao prostoriju obloženu limom bez prozora i svjetlosti za privremeno lagerovanje mesnih proizvoda u hladnjači gdje je sa više lica srpske nacionalnosti bio zatvoren J. Lj., koji je kao civilno lice 15.05.1992. godine nezakonito lišen slobode u Brčkom i koji je zadržan u logoru do 29. juna 1992. godine, skoro svakodnevno u različito doba dana i noći ulazio u prostoriju i zajedno sa R., H. i V., tukao je Lj., a više puta su ga šutirali u predjelu polnog organa zbog čega je trpio izuzetno jak bol, a jedanput su ga izveli u hodnik tražeći da sebi upaljenu cigaretu stavi u analni otvor, pa pošto to nije učinio, zadali su mu jak udarac u predjelu rebra na lijevoj strani usled čega mu je slomljeno rebro, i psihički je zlostavljan na način da su ga tjerali da pjeva o Juri i Bobanu, laje i zavija kao vuk;

6) Š. M., S. B., S. B. i S. M., koji su kao pripadnici Vojske Republike Srpske zarobljeni u naselju Ivici u Brčkom 22.06.1992. godine i sprovedeni u logor Okrajci, gdje su M. i B. zatvoreni u prostoriju obloženu limom bez prozora i svjetlosti za privremeno lagerovanje mesnih proizvoda u hladnjači gdje se nalazilo zatvoreno više lica srpske nacionalnosti, a B. i M. zatvoreni su u kancelariju sa rešetkama na prozoru i vratima, gdje su svi zadržani do 29. juna 1992. godine, a zaključane prostorije je čuvao uniformisan i naoružan stražar A. M., i istog dana odvedeni su u kancelariju za ispitivanje, gdje je N. zajedno sa R. H. zvanim „...“ i S. R. zvanim „...“ u toku ispitivanja tukao po raznim dijelovima tijela M., B., B. i M., a R. ih je udarao pesnicama na kojima su se nalazile rukavice sa metalnim nitnama, nogama i motkom, i dok su ih tukli B. je više puta gubio svijest, a kad se B. počeo braniti, R. ga je motkom udarao po glavi dok se motka nije slomila, usled čega se B. desno oko zatvorilo, krv je šiknula i izgubio je svijest, a u jednom momentu R. je M. nogom udarao u predjelu ramena i vilice i oborio ga, a dok su M. vraćali sa ispitivanja, nastavili su ga udarati, od udaraca je pao i tada su po njemu urinirali;

7) S. M. i S. B., kada su posle ispitivanja zatvoreni u kancelariju sa rešetkama u logoru Okrajci, koju je čuvao uniformisan i naoružan stražar A. M., u više navrata od 22.06.1992. godine do 29.06.1992. godine, nakon što bi M. otključao prostoriju, u različito doba dana i noći ulazio zajedno sa R. H. zvanim „...“ i S. R. zvanim „...“, tukao i zlostavljao M. i B., u kojem periodu je M. zadobio više udaraca u predjelu rebra, glave i vilice i od zadobijenih udaraca gubio je svijest, a B. su tukli tako da je od udaraca gubio svijest, od bolova i straha nekontrolisano je urinirao, plinskim upaljačem palili su mu podlaktice usled čega su se pojavili plikovi, a neutvrđenog dana natjerali su ih da međusobno vrše bludne radnje;

dakle, kršeći pravila međunarodnog prava za vrijeme oružanog sukoba kao saizvršilac prema civilnom stanovništvu vršio mučenje, nečovječno postupao, nanosio velike patnje i povredu tjelesnog integriteta i zdravlja, (tačka 1,2,4,5) i kršeći pravila međunarodnog prava za vrijeme rata i oružanog sukoba kao saizvršilac prema ratnim zarobljenicima vršio mučenje, nečovječno postupao, nanosio velike patnje i povrede tjelesnog integriteta i zdravlja (tačka 3,6,7).

čime bi:

učinio krivično djelo –Ratni zločin protiv civilnog stanovništva čl 142. KZ SFRJ (tačka 1,2,4,5) i krivično djelo - Ratni zločin protiv ratnih zarobljenika čl 144. KZ SFRJ (tačka 3,6,7)